



Gabinete Wever - Croes II

ISLAONLINE

Noticia di Gobierno

2023

Diaranson 19 April 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



PROME MINISTER A ATENDE ACTIVIDAD DI LIMPIESA DI PLAYA CU A TUMA LUGA NA EAGLE BEACH

Prome Minister a incia diaranson mainta na Eagle Beach cu e actividad Beach Clean up di Bucuti & Tara hunto cu AAA y alumnonan di Mon Plaisir Basis School y turista. Na e ocasion Prome Minister a hiba palabra reflexionando riba e tempo dificil cu a pasa aden den periodo di pandemia y con bendishona Aruba ta awe danki na resiliencia di cada ciudadano.



E pandemia a dal Aruba hopi duro y manera cu ta conoci, na cierto momento Prome Minister a tuma e decision pa cera frontera. Esaki Premier Wever - Croes a describi como un di e decisionnan di mas dificil cu e mester a tuma durante su gobernacion. E pandemia no a bin cu instruccion of notificacion, pues na prome instante no tabata sa kico pa spera, con largo e lo dura y kico pa haci. Ademas, Aruba ya tabatin varios reto existente cual tabata atendiendo cu ne. Sinembargo, unabes cu a cera frontera, inmediatamente a cuminsa traha riba e reapertura di frontera y pa por yama bon bini un bes mas na bishitantenan.



Prome Minister a expresa tambe cu awor ora cu wak bek ta mira cu e tabata un periodo cu basta reto, pero e forma con e comunidad di Aruba a bin hunto y demostra resiliencia, ta musta e amor cu tin pa Aruba.

'Pa mira turista y bishitantenan cu a bolbe bek y ta yuda reconstrui Aruba despues di e pandemia, tambe ta un señal di Amor pa Aruba, cual mi ta orguyoso di dje', Prome Minister a termina bisando

Awor ora cu wak bek,
ta mira cu e tabata un
periodo cu basta reto,
pero e forma con
e comunidad di Aruba
a bin hunto
y demostra resiliencia,
ta musta
e amor cu tin
pa Aruba.

Prome Minister

Evelyn Wever-Croes

**ACTIVIDAD DI LIMPIESA DI PLAYA
NA EAGLE BEACH**





PROYECTO DI PORT CITY LO TIN UN IMPACTO POSITIVO RIBA ECONOMIA DI PAIS ARUBA

"E meta di Gobierno di Aruba ta pa crea progreso y bienestar general pa nos pais y pa logra esaki nos mester desaroya nos economia"



Diamars atardi, Prome Minister Evelyn Wever-Croes a atende un evento organisa pa Aruba Ports Authority (APA), na unda nan a presenta oficialmente e proyecto di Port City na "lenders" y na diferente compania.

Prome Minister, durante su discurso a splica tocante e impacto cu e pandemia tabata tin riba e economia di pais Aruba y e pasonan cu Gobierno mester a tuma e tempo ey pa salvaguardia bida di esnan severamente afecta. Prome Minister tambe a indica cu actualmente pais Aruba ta den recuperacion y cu inversionnan den proyectonan manera Port City ta di gran beneficio pa e economia di e pais.

Pa e proyecto aki, sector priva lo haci un inversion di casi 500 milyon dollar, haciendo esaki e inversion mas grandi den infraestructura cu pais Aruba a yega di conoce. Na su turno,



APA lo bay inverti casi 80 milyon dollar den espacionan publico, parkeo, y parkenan recreacional. Na final e proyecto aki lo tin un impacto positivo riba e economia di pais Aruba, e lo desaroya e economia, crea oportunidad economico nobo, crea cupo di empleo, y crea un generacion di divisas cual ta loke Aruba mester pa caba di fortifica.

"E meta di Gobierno di Aruba ta pa crea progreso y bienestar general pa nos pais y pa logra esaki nos mester desaroya nos economia. Mi ta felicita Minister Dangui Oduber y henter e ekipo di APA cu ta haci esaki posibel. Tambe, mi ta gradici tur e "stakeholders", e comunidad di Aruba, specialmente e comunidad comercial pa e interes musta den e proyecto aki. Hunto nos ta logra cosnan grandi pa Aruba", Prome Minister a expresa.



Prome Minister y Directora di Directie Voor Innovatie

A DUNA INFORMACION DI E VISION DI INNOVACION DI GOBIERNO NA E COMISION DI PARLAMENTO CU TA ENCARGA CU CIENCIA, TECNOLOGIA Y INNOVACION

Diaranson 19 di April, riba invitacion di Presidente di e comision di Parlamento cu ta encarga cu Ciencia, Tecnologia y Innovacion, Prome Minister Evelyn Wever-Croes tawata presente pa duna informacion riba e vision di innovacion di Gobierno.

Prome Minister a presenta hunto cu señora Indra Zandaam, Directora di Directie Voor Innovatie cu ta esun cu ta encarga cu e maneho di innovacion di Gobierno. Tambe señora Zandaam ta encarga cu e proyecto importante di e-Government y cu e cambianan cu mester bin den cuadro di e landspakketnan.

“E vision di innovacion di Gobierno ta pa soluciona problemanan cu innovacion. Na Aruba mester realisa cu no por soluciona mesun problemanan cu e mesun solucionnan pasobra asina nan lo no por wordo soluciona. Pa soluciona problemanan, mester bin cu solucionnan nobo, innovativo y diferente”, Prome Minister a remarca.

Innovacion no ta solamente digitalisacion of automatisacion. Innovacion ta cualkier otro manera cu por soluciona algo na un forma nobo. Esaki, Prome Minister a infatisa, ta importante pa Gobierno di Aruba.

“Mi ta hopi contento di mira cu tur minister den tur ministerio tin hopi proyecto di innovacion. Cua tawata e intencion tambe na

comienzo di Gabinete Wever-Croes I ora cu a pone innovacion central den nos maneho y awor innovacion ta wordo carga door di tur minister.

Prome Minister a duna di conoce cu e reunion tawata hopi bon na unda cu hopi informacion a wordo comparti cu Parlamento entre otro cu Gobierno ta den contienda pa haya 13 mion Euro di Hulanda pa e proyecto di e-Government. Dos aña pasa Gobierno a inscribi pa e proyecto aki y a haya aprobacion di e proyecto den prome instancia y a pasa pa e di dos fase cua tawata pa duna tur informacion y awo ta wardando si Aruba lo haya e fondo aki cual lo ser duna otro aña pa asina Gobierno ehecuta e proyecto di e-Government mas lihe.

“e-Government ta e proyecto pa digitalisa e procesonan di Gobierno pa asina e ciudadano no mester bay diferente caminda pa haya documentonan mas y lo facilita esaki via computer of na un bali so haya tur loke cu tin mester. Cu esaki, procesonan den gobierno lo bira mas eficiente y transparente pa duna miho servicio na nos comunidad. Nos ta aprecia cu Parlamento tin hopi interes den e topico aki. Nos a ricibi y contesta hopi pregunta di Parlamento y e siguiente biaha cu mi mester bin duna informacion na e comision aki, mi lo bin cu FUTURA pa splica tur e proyectonan di innovacion cu Gobierno ta ehecutando desde cu a drenta den gobierno na 2017”, Prome Minister a duna di conoce.



MINISTER MADURO TABATA PRESENTE NA E BUSINESS EVENT DI ARUBA PORTS AUTHORITY NV PA CERA CONOCI CU DETAYENAN DI PORT CITY ARUBA

Minister Maduro di Finansa y Cultura tabata presente na e Business Event di Aruba Ports Authority APA pa asina haya sa mas di e dos proyectonan cu APA ta preparando cual ta e desaroyo urbano di Port City Aruba na Oranjestad y e zona logistico na Barcadera. Esakinan ta dos proyecto cu sigur lo duna un empuhe na economia di Aruba. Port City Aruba lo yuda mehora e producto turistico, specialmente e turismo crucero.

E proyecto lo crea un experiencia nobo pa nos bishitantenan y nos localnan.

Minister Maduro ta felicita Minister di Turismo, Dangui Oduber, e team di APA, Departamento Economico y tur persona y instancia cu ta duna un aporte pa realisa e bunita proyectonan aki na bienestar di nos Pais.





MINISTER XIOMARA MADURO


PARLAMENTO A FORMALISA E SOSTEN FINANCIERO PA KWARTAAL DI 4000 FLORIN DUNA NA COMPANIA CHIKITO Y MEDIANO DURANTE PANDEMIA

Durante e pandemia Gobierno di Ariba a percura pa brinda yudansa na comercio den forma di Alivio Fiscal 1 y 2, Sosten Financiero pa negoshi chikito y mediano di 4000 florin pa kwartaal, micro-credito via Qredits y Subsidio di Salario. Na juni 2020 den un carta na Parlamento, Minister Maduro e tempo eyan como minister encarga cu asuntonan economico, hunto cu Minister President a informa Parlamento debidamente di e yudansa financiero cu Gobierno lo bay brinda na comercio pa asina por surpasa e pandemia. Den presupuesto di Pais Aruba a presupuesta cada yudansa financiero cu a wordo brinda den aña 2020 y 2021. Na e mesun momento a cuminsa traha riba e leyman pa asina por formalisa cada yudansa ofreci. Esaki ta necesario ya cu di e manera aki Gobierno ta cumpli cu e reglanan di bon gobernacion y ta duna e transparencia necesario.

Parlamento di Aruba e ultimo tempo a trata e leyman pa formalisa

e Subsidio di Salario, Alivio Fiscal den Plan di Impuesto 2023, micro-credito via Qredits y finalmente e siman aki Parlamento a formalisa e yudansa den forma di Sosten Financiero pa Negoshi Chikito y Mediano di 4000 florin pa kwartaal. Di e manera aki tur yudansa financiero brinda durante di e pandemia di COVID-19 a keda debidamente formalisa den nos leyman. E leyman aki no tabata pa absolve Minister Maduro como ex Minister di Economia di ningun acto dudoso, sino simplemente pa formalisa e leyman pa asina por cumpli cu reglanan di bon gobernacion y transparencia.

Minister Maduro ta gradici tur instancia y persona cu a traha pa por a ofrece e yudansa importante aki na comercio durante e pandemia, specialmente na Departamento Economico, SVB, Departamento di Estadistica, Departamento di Impuesto, Bureau Rampenbestrijding, ATIA, AHATA y Camara di Comercio.



PROYECTO DI PORT CITY A KEDA PRESENTA NA TUR INSTANCIANAN FINANCIERO LOCAL

Diamars atardi Minister di Turismo y Salud Publico a presenta e proyecto di Port City na tur e instancianan financiero di Aruba. Minister President sra. Evelyne Wever-Croes tambe tabata presente conhuntamente cu demas coleganan Ministernan Xiomara Maduro y Endy Croes. E proyecto di Port City ta bay enfoka riba mehoracion di e producto turistico general di Aruba, specialmente nos turismo crucero. Creando asina un experiencia nobo pa nos bishitantenan como tambe nos localnan.

E vision di e poyecto ta pa desaroya un mixto di actividadnan comercial pa sirbi e tendencia di turismo global obhetivamente, pa trece e turistanan afluente cu tin e deseo pa haya un experiencia local y unico como e obheto principal.

Importante pa mencioa ta e hecho cu a tene cuenta den un bon balansa desaroyo den e proyecto aki. Den henter e area disponibel gran mayoria ta bai ta areanan publico, parke di recreacion, boardwalk, scenic road y espacionan habri pa uso di publico.

E magno proyecto aki ta bay wordo financia uzando nos propio instancianan financiero y ta bira un inversion di sector priva di \$500 miyon.

Minister Oduber a presenta e proyecto aki como un oportunidad unico den bida pa haci inversion. Portcity ta e proyecto mas grandi den historia di pais Aruba.

E mandatario a splica e modelo cu APA lo bay uza caminda APA lo ofrece e terenonan aki por medio di ondererfpacht. E desaroyodador cu gana e destaho publico lo mester paga

40% di e erfpacht di manera delanta y e resto di 60% durante un periodo di 60 aña. Entradanan cu lo wordo genera, APA lo inverti bek den infraestructura, caretera, landscaping, boardwalk y mantencion di esaki. Minister Oduber a señala cu e proyecto di Port City a keda integra den e estudio di "Carrying Capacity". Tur e desaroyonan na caminda lo bay cumpli cu tur regla y segun nos leynan di e ROPV.

Port City un magno proyecto cu tin hopi potencial, e lo rekeri un inversion priva di \$500 miyon dollar cu lo crea un spinoff economico hopi grandi pa nos pais. Tambe e lo crea hopi cuponan di trabou door di uza nos mesun contratistanan, e lo genera entrada pa APA, Gobierno y contribui grandemente na nos GDP. Un bunita proyecto cu lo bay trece mehoracion den e calidad di bida di nos ciudadanonan.

Minister Oduber a compromete pa atraves di e proyecto di Port City sigui duna tur sosten na nos industria turistico y lo continua na crea ambientenan caminda ta fomenta cresemento economico y exitonan continuo pa henter nos comunidad.

E proceso lo bira uno habri, transparente y cumpliendo cu e reglanan di corporate good governance.

Finalmente Minister Dangui Oduber a gradici henter e ekipo di Aruba Ports Authority N.V. kendenan a traha incansablemente den e proyecto aki, colaborando cu Port of Amsterdam International y partnernan clave manera Departamento di Asuntonan Economico y Departamento di Ifraestructura pa haci e proyecto aki posibel.



POTRETNAN DI PROYECTO DI PORT CITY



DEN UNION Y CU POSITIVISMO
NOS LO HIBA NOS PAIS
PADILANTI!



Geoffrey Wever
MINISTER



HUNTO CU UN DELEGACION DI COMERCIANTENAN LO BIAHA PA COLOMBIA

Durante e conferencia di prensa riba 18 di april, Minister Geoffrey Wever den cooperacion cu Kamer van Koophandel Aruba (KvK) a anuncia un mision comercial pa Colombia den siman di 22 di mei 2023.

Colombia ta importante pa desaroyo economico di nos pais. Banda cu nos hendenan tin lasonan familiar cu Colombia, e ta un pais cu nos hendenan gusta bishita. E laso di negoshi tambe ta grandi. Colombia ta den e top 10 di paisnan mas importante pa nos economia. Ta importante inverti pa mantene, fortifica y intensiva e laso comercial cu Colombia.

P'esey den cooperacion estrecho cu Kamer van Koophandel Aruba ta organisa un mision comercial. Sector priva a vocifera kico ta nan deseonan y e oportunidadnan cu e mercado di Colombia tin pa ofrece, tambe con gobierno di Aruba por facilita esaki. A base di tur e informacion aki a traha un programa unda minister Geoffrey Wever y e delegacion di comerciantenan lo bai como team pa hunto bishita e pais y traha pa stimula mas comercio.

Mision comercial ta un di e instrumentonan importante den maneho economico di un pais. Meta di e mision comercial ta

pa – banda di fortifica e cooperacion economico entre e dos paisnan – tambe facilita cu negoshinan di Aruba tin mas acceso na e mercado Colombiano, y vice versa. Tipo di delegacionnan asina ta contribui na stimula e conexionnan necesario pa nos consumidornan por tin mas escogencia den productonan y servicio, na diferente prijs y calidad.

“Ta importante pa accentua e realidad cu Aruba su economia ta uno chikito y ta depende riba importacion di mayoria di su productonan”, segun minister Geoffrey Wever. “Colombia no ta keda leu di nos pais y ta esencial pa explora oportunidadnan comercial cu Colombia tin pa ofrece cu por trece beneficio pa nos comerciantenan y consumidornan”.

Un invitacion ta bai na tur comerciante cu sea kier importa of exporta pa Colombia, of crea otro lasonan comercial, pa participa na e sesion di informacion di KvK diahuebs awo, 20 di april 2023, pa haya sa con como comerciante por participa na e mision comercial y asina haci e mision comercial uno mas fructifero.

Minister Geoffrey Wever ta gradici Kamer van Koophandel pa e bon cooperacion.

IMPLEMENTACION DI ARUBA FAIR TRADE AUTHORITY (AFTA) TA PROGRESANDO

Aruba Fair Trade Authority ta na beneficio di e pueblo di Aruba completo; pa consumidor y comerciante. Reglanan di concurrencia ta aporta positivamente na hacimento di negoshi y na clima di inversion di un pais. Miho competencia ta contribui na miho prijs, miho servicio y miho producto.


Aña pasa Minister Geoffrey Wever a cuminsa cu implementacion di e Aruba Fair Trade Authority (AFTA). Actualmente ta preparando e aspectonan di proceso y proceduranan di AFTA, y tambe pa cu e parti di e perfil di e personal cu lo bai traha den AFTA.

Diamars 18 april, Minister Geoffrey Wever a ricibi un presentacion di e Aruba Office di Deloitte Dutch Caribbean over e organisacion

administrativo y control interno (AO/IC) di AFTA y tambe e proceso y proceduranan pa e aspecto di recurso humano (HRM). Esakinan lo wordo entrega na e futuro Raad van Bestuur di AFTA pa aproba esaki.

Dentro di poco ta cuminsa busca y selecciona e miembronan di e Raad van Bestuur di AFTA y personal (6 empleado).

Minister Wever ta reafirma e importancia di AFTA den e clima empresarial di Aruba. Ta importante pa tur hende comprende e beneficio di AFTA pa nos consumidornan y nos economia. Miho competencia ta contribui na miho servicio, miho producto, y tambe e miho prijs posibel, algo cu cada ciudadano sigur ta balora.





MINISTER ENDY CROES TA FELICITA E COREDONAN DI BMX CU A CONKISTA DIFERENTE PREMIO DEN E COMPETENCIA DI DIXIELAND BMX NA MERCA

Dialuna atardi, Minister Endy Croes tabata na Aeropuerto Internacional Reina Beatrix pa ricibi e coredonan cu a sobresali den e competencia di e deporte di BMX cu a yega Aruba. E hobennan a participa pa tres dia largo den e competencia di Dixieland BMX speedword y streetwise cu a tuma luga na Atlanta, Georgia na Merca. E hobennan Tharel Simon, Jaxx Fowler, Jaykson Kock, Noah Arends, Zion Angela y David Simon a conkista varios premio.

Minister Endy Croes ta manda palabra di felicitacion na nos coredonan cu a sobresali den e Dixieland BMX National na

Atlanta. Danki na coaching staf Sr. Pedro Estaba y tur mayor cu a brinda sosten pa nan yiu por a participa den e competencia. Aruba ta orguyoso di boso! Masha pabien!





POTRETNAN DI
COMPETENCIA DI
DIXIELAND BMX NA MERCA





CLAUSURA DI WEGANAN INTERINSULAR 2023 TA TUMA LUGA DIA 21 Y 22 DI APRIL NA ARUBA

Despues di shete aña Weganan Interinsular entre scolnan di Aruba, Boneiro y Curaçao ta tumando lugha bek. Minister Endy Croes a indica cu hunto cu colega Minister di Enseñansa, Ciencia, Cultura y Deporte di Curaçao Sithree van Heydoorn y Diputado di Infraestructura y Deporte di Boneiro James Kroon a traha hopi duro pa cuminsa cu Weganan Interinsular bek.

Den luna di september di aña pasa a firma un acuerdo cu lo trece Weganan Interinsular bek. Na luna di maart di e aña aki Weganan Interinsular 2023 a inicia na Boneiro unda cu e scolnan a participa den e disciplina di dam y schaak. Sigui na Curaçao, unda e hobennan a participa den e disciplina di atletismo y trefbal.

Clausura di Weganan Interinsular 2023 ta tuma lugha na Aruba

dia 21 y 22 di april. Ministerio di Deporte hunto cu IBiSA ta encarga pa e evento aki y lo prepara un show bunita pa e pueblo di Aruba y pa nos bishitantenan di Curaçao y Boneiro cu lo ta presente pa e clausura di Weganan Interinsular 2023.

Minister Endy Croes ta invita pueblo di Aruba pa apertura di Weganan Interinsular cu ta tuma lugha diabierna, 21 di april pa cinc'or y mey na Cruyff Court Denzel Dumfries na Jaburibari.

Hunto ban apoya y sostene nos hobennan cu ta competiendo pa e titulo maximo den e disciplina di futbol y volleyball di Weganan Escolar 2023. Minister Endy Croes ta desea e hobennan hopi exito; boso deseo cu disciplina, dedicacion, determinacion boso ta logra.



SINTONISA CONFERENCIA DI PRENSA DI GOBIERNO DI ARUBA

Gabinete Wever-Croes

Tur dialuna y diahuebs | 10:00 am

WEGANAN INTERINSULAR

Aruba

ARUBA BONEIRO CURAÇAO
21-22 APRIL 2023

Invitacion

*Bo(so) ta keda cordialmente invita pa asisti na e
Apertura y Clausura di Weganan Interinsular 2023.*

Apertura

Fecha: 21 di april 2023
Ora: 5:30PM – 7:00PM
Luga: Parke Curason
Jaburibari (Cruyff Court)

Clausura

Fecha: 22 di april 2023
Ora: 6:30PM – 9:00PM
Luga: Hyatt Place Airport
(Ballroom)

Dress code: Sport Casual
Bo(so) presencia ta altamente aprecia.



Diamars atardi Minister di Turismo y Salud Publico sr. Dangui Oduber a reuni cu director di ImSan dr. Rajnherc y e president di e Junta di Supervision di ImSan sr. Igmar Reyes encuanto e entrega di e cuenta anual di ImSan aña 2022. Un biaha mas ImSan ta haci entrega di nan cuenta anual dentro di e tempo stipula. Actualmente ImSan tin 268 trahador den servicio fiho. Contrario cu aña 2021 caminda tabata tin un deficit den e cuenta anual, aña 2022 ImSan a logra yega na un cuenta anual neutral pero dunando mucho mas servicio.

Den aña 2022 ImSan a duna 1500 servicio medico mas den comparacion cu aña 2021. ImSan a muestra riba e hecho cu den aña 2022 e costo nan den compras y transporte di productonan medico, aparatonan medico y servicionan mundial a conoce un aumento drastico (entre 7% - 11% por ciento di producto y servicio procedente di Hulanda). Asina mes ImSan a logra sera un cuenta anual neutral, e mandatario ta splica.

MOU

Dia 8 di December 2022 un Memorandum of Understanding (MOU) di acuerdonan mas principal a keda firma entre ImSan y Dr. Horacio E. Oduber Hospital. Esaki a keda firma pa por mehora e cooperacion entre e 2 hospitalnan. Pa duna un miho servicio na e comunidad di Aruba y na un manera mas eficiente.

Inversionan

Conforme e maneho di ministerio di turismo cu ta pa haci inversionan continuo den cuidu pa mehora calidad di cuidu y servicio, ImSan a haci inversion den compra di 2 ambulance y tambe 7 stoel nobo pa dialyse pashent. Tambe inversionan a wordo haci pa reduci e lista di espera den retinologia.

Acreditacion di JCI

Den aña 2022 ImSan a haci hopi esfuerzo pa por cumpli cu e standard di calidad y protocol di calidad di Joint Commission International (JCI), optimalisando asina tambe nan provision den cuidu medico. ImSan su meta ta pa logra haya e acreditacion di JCI den e di dos cuartal di aña 2023. Acreditacion di JCI ta hunga un rol importante den e control di calidad y den e cumplimiento di dicho calidad den e hospital. Nan ta enfatisa riba e mehoracion den e prestacion di cuidu, optimalisando e maneho basa riba e midimento di cambianan clave den e aspecto di calidad. E acreditacion aki ta haci posibel tambe pa Aruba bay den e direccion di turismo medico, ya cu e seguronan medico internacional ta traha cu institucionan cu ta acredita pa JCI asina Minister Oduber a duna di conoce.

Radioterapia

Den aña 2022 ImSan a logra un “milestone” importante caminda nan a trata nan di 500 pashent completo cu radioterapia. Tur e pashentnan ta wordo trata na ImSan cu aparatonan moderno, “state of the art” di radioterapia. Tur esaki ta wordo haci den bon cooperacion cu e partner strategico di Miami Cancer Institute cu ta forma parti di Baptist Health South Florida.

Mehoracion den areglo di pensioen

Despues cu ImSan a bay den negociacionnan intensivo durante 3 luna cu diferente instancia cu ta segura pensioen. Riba 1 di augustus 2022 a logra sera un acuerdo nobo di pensioen caminda tur trahador inmediatamente a ricibi un acumulacion mas halto di e pensioen y cu un prima mas atractivo. Banda di esaki e areglo nobo ta ofrece otro productonan atractivo manera e oportunidad pa haya seguronan na miho prijs y interes di hypotheek mas abou.

TOTAL DI 13 PROYECTO BASA RIBA E TEMANAN:

- Awa
- Cuminda
- Energia
- Construcccion
- Sostenibilidad comercial

Pa mas informacion por lesa plan completo na: www.deaci.aw

Ministerio di Asuntonan Economico,
Comunicacion y Desaroyo Sostenibel



MINISTER GEOFFREY WEVER:


PLAN DI ACCION PA UN MODELO ECONOMICO SOSTENIBEL Y INCLUSIVO

Desaroyo di un pais chikito, manera Aruba, mester di un vision ambicioso y a base di un plan coordina, unda ta tene cuenta cu desaroyo actual riba nivel local, pero tambe mundial. Un meta comun, unda miho calidad di bida pa nos ciudadanonan, desaroyo y diversificacion economico, social y di medio ambiente ta keda primordial.

Cu e proposito aki, a traha riba un plan cu a considera temanan importante pa nos sigura cu Aruba como isla por keda un pais placentero y prospero pa biba. Por ehempel, produccion di awa y cuminda ta esencial pa nos por sobrevivi. Pero tambe como pais ta esencial cu nos por suministra nos mesun cuminda y energia (coriente) mas cu ta posibel, asina reduci nos dependencia riba importacion. Como tambe ta importante pa awa, cuminda, energia y material pa construi nos hogar por keda pagabel.

Considerando e factornan aki, a formula un plan di accion nacional 'Aruba su Transicion pa un Modelo Economico Sostenibel y Inclusivo 2023-2025'. A formula un total di 13 proyecto basa riba e temanan di: awa, cuminda, energia, construccion y sostenibilidad den comercio. Ta asina cu tambe

lo mester considera e manera cu negoshinan ta opera y nan impacto riba nos comunidad y medio ambiente.



Cu e meta di stimula e siguiente sectornan: produccion di awa y coriente, agricultura comercial y construccion sostenibel, lo enfoca riba promove conocimiento y tecnologia alternativo, esta 'green technologies'. Asina lo haci posibel, eficiencia y desaroyo na un costo mas efectivo, reduciendo costo di bida.

E proyecto aki no ta solamente un proyecto di un ministerio pero di henter gobierno di Aruba pa henter Aruba y cu ta rekeri participacion y colaboracion di diferente ministerio por ehempel, ministerio di naturalesa, ministerio di infraestructura, ministerio di energia, entre otro. E plan aki ta e prome fase unda a habri e caminda pa cuminsa e dialogo y enfoca riba e temanan cu ta importante pa nos calidad di bida na Aruba.

Minister Geoffrey Wever ta invita un y tur pa lesa e plan cu ta accesibel riba e website di Departamento di Economia, Comercio y Industria (deaci.aw) y asina aporta na e transicion pa un Aruba mas sostenibel y inclusivo.



Desaroyo y progreso di un pais ta mas
sostinibel, fuerte y lihe ora cu cada
ciudadano di e pais uni den esfuersonan
y contribui cu positivismo na e vision
pa logra cosnan grandi pa futuro.

2023 AÑA DI UNION Y POSITIVISMO! _____